

BUSOLOLI

 Muli jisi ncobeni. Ikuti na ncibotu kweelela kuli ndinywe nyoonse, ncibotu kweelela kuli ndiswe, ambebo.

² [Ii mukwesu waamba, “Lino bapa cipo cabu kuli nduwe.”—Mul.] Ma, eco cilabotelzya. Nda lumba. [Ii mucizi waamba, “Cipego buyo ciini, Mukwesu Branham, bana baka yobola masheleni a maseenti abo manji. Elyo...?...”] Ndaku lumba. Ndaku lumba, mukwesu wangu muniini. Ndaku lumba, nobana. Nda lumba ncobeni, maningi, maningi. Elyo Leza amu longezye.

³ Nywebo mulizi, Jesu wakati, “Mbuli mbo mupa ku baniini aba, mwa cicitila kuli Ndime.” Mwabona? Muli baalumi a banakazi ba juunza, ikuti na kunooli juunza, mu nooliko, Leza uyaamina kuli ndinywe.

⁴ Nda lumba maningi, oyandwa. Sa Ndi cijule? Uli cijisi kabotu loko, cibaanga nciyumu ku...oh ma, calo cilabotelezya. Syanene weelede kubweza magilazi akwe, nywebo mulizi: “Lusyomo mu...nseke ya mbuto iya musitada...Mulumbe wako...”

Sa eco tacili cibotu? Mwabona? Oh, ma, ma! Nda bijilwa kuli ndinywe kundipa ceeci. “Oyandwa Mukwesu Branham, Oh, uli mweenzuma mubotu loko. Tu langila kuti uyo—uyo lelekwa a zintu zyoonse nzota jane. Tula kuyanda; mu lukkomano olo loonse; a nguzu, uyandwa Mwami Jesu aku longezye cabuvubi.”

Oh, eco cila botelezya loko. Nda kulumba, omuyandwa, umwi aumwi wanu. Eco ncibotu loko.

[Ii mukwesu waamba, “Mukwesu Branham, Nda syoma uyo zuminana tu jisi mwiiyi mubotu wa Cikolo ca Munsondo.”—Mul.]

Uli jisi ncobeni. (Kondi jatilila buyo eci, Billy.) Lino, eci cili kabotu loko, cacitwa kabotu loko, Nda bijilwa ku jula. Botu loko. Nda bbeja umwi wa bamanyina wakacita ceeci cimwi. Sa mbo mbubo? [Mukwesu Branham wajula cipego cimbi—Mul.] Huh? Ee, Nde elede ku... Taciko sotoka kuzwa? Oh, ma. Oh. Oh, ma. Eco ncibotu loko...?... tula unka a ceeco. Leo, uyo gambwa oyo mukwasyi nkwa zulilwa. Ula citonta mu cifwanikiso coonse. Eco ncibotu loko.

Lino, nobana, oyo mulangu lwa bunji nkabela Njo bweza ceeci a ku caanzika mu ng'anda yesu mpya. Elyo Ndi yeeyela kuti kufumbwa kuti—mbuli mbo tujisi muunzi tuyoooba a ceeci mu kwibaluka kwa cikolo eci ciini ca Munsondo okuno ku Prescott. Nda pa kulumba kuli Leza, kupa kulumba ku Mwami ku zintuzyonse; elyo Nda pa kulumba kuli Leza ku balombe a

basimbi baniini babotu mbuli ndinywe nyoonse mbo mubede. Amu ndiyeeye buyo mu ciindi eci—eci. Leza amu longezye nyoonse. Lumba kapati, inzya, ncibotu loko. Bunanike, eco ncencico buyo nco twali kuyanda, cintucimwi mbuli ceeco. Takuko cita na?

[Ii mukwesu wakanana—Mul.] Kabotu.

[Ii mukwesu waamba kwiimba kwa kakanzwa ku miniti lyamamanino.] Nce cindi nokuli kabotu.

[Ii nkamu ya bacizi baimba kuti *Kuseluka Kuzwa Ku Bulemu Bwakwe.*]

O obo Mbwe Mu yanda! Obo Mbwe Mu
yandisya!

Kuyoya kwangu, mumuni wangu wazuba, ngu
zyoonse zyangu!

I Mulengi mupati wakaba Mufutuli wangu,
A boonse buzule bwa Leza bukkala muli
Nguwe.

[I bacizi bala zumanana kwiimba *Kuseluka Kuzwa Ku Bulemu Bwakwe.* Ii mukwesu usololela *Kosyoma Buyo—Mul.*]

...Syoma buyo,
Zintu zyoonse zilakonzeka, syoma buyo;
Syoma buyo, syoma buyo,
Zintu zyoonse zilakonzeka, syoma buyo.

Nda syoma inga Nda kambauka maora one lino, kumane koonse oko. Nda kali kutalika kuyeeya kuti Nda kali kuya bukatala. Ta cigambyi nywebo nobasimbi baniini inga mwaimba kabotu loko, nywebo nobasimbi a balombe baniini; amuswiilile obo bacizi banu batapi mbo baimba, a bamanyokwe, baimbi babotu. Eco ncibotu loko. Nguni oyu musimbi muniini waka sololela lwiimbo olo, sa toli musimbi muniini Ngwe kaswaanganya kutala okuya? Masimpe ujisi jwi bbotu; nyoonse nywebo. Nywebo buyo... Nda syoma mbo cakabede, kwiimba kubotu loko nko Nda kasola kumvwa, kuli mpoonya awa. Nyoonse mulaiya eco ciindi coonse? [Ii mukwesu waamba, “Peepe. Eyo nje nzila mbo twiimba.”—Mul.] Ee, Nda mwaambila, nywebo—nywebo muli lelekedwe ncobeni a kwiimba kumwi kubotu loko.

⁵ Nda botelwa kwiimba kubotu. Nda kubotelwa buya kwiimba kubotu loko. Nda kaamba lyoonse, cindi Nda kusika ku Julu Ndi yanda kuya kusika oko nkoba imba, a kuswiilila. Nse kakonzya kuzula kwangu kwa kwiimba.

⁶ Nywebo mulizi, kwiimba kupa camba. Nywebo mulizi obo, embo na? I basilumamba, cindi bano uunka ku nkondo, nywebo mulizi eco ncoba cita? Ba lizya ciimbo a kwiimba, a zintu zya kubapa camba. Elyo cindi twa kuunka ku nkondo, tula imba, alimwi—alimwi kutupu camba caku zumanana.

⁷ Nda mulumba nobantu baniini ku cipego eco cibotu. Elyo ngu...Muka. Branham, a kuzwa kuli Rebekah, a Joseph, a Sarah, a toonse swebo, twa mulumba maningi. Nciyumu kwaamba, nzila ya kubaambila bantu baniini, "Peepe. Wa kayobolla masheleni anu. Nse—Nse yandi kwaab bweza." Nywebo mulizi obo Mbwe limvwa, Nse yandi kwaab bweza. Pele nekubaboo Nda kalanga mukati awa nkabela ba jisi mali ya madollar ali kkumi mu kkaadi eli. Nda kayeeya, "Sa Ndi ibweza?" Nda yeeya, "Mbobuti Mbwe konzya kucicita?"

⁸ Pele Nda yeeya kaano kaniini Nke yanda kuti muzibe. Buzuba bumwi kwakali mukamufu, waa kajisi cikama ca bana, antela wakwe...baloo bawisi baniini bakali fwide. Elyo waa kajisi buyo masheleni obilo. Elyo waa kaselemuka kagwagwa, ciindi cimwi...Elyo akali mali kwa kkumi, masheleni buyo mbuli nyoonse mbo mbwa kayobola, alimwi waa kaabikka mu ciyobwedo ca Leza. Jesu wakaliimvwi alya, ka mulangilila. Elyo Nda kalibusya, "Ino inga Ne kacita nzi ikuti na Nda kaliimvwi okuya?" Inga antela nekazuzila atala a kwaamba kuti, "Peepe, peepe, mucizi, uta citi eco. Ta—ta tuciti, tatu ciyandi ncobeni. Ula ciyandikana ku bana." Mwabona? Lino, ni Nda taka mulekela kucicita. Pele Jesu waka mulekela kucicita. Mwabona, Wa kamulekela kucicita. Nkaambonzi? Uli zyi kuti kuli lelekewde kapati kupa kwiinda mbo kweelede kutambula. Wa kalizi eco Nca kali kuyo mucitila, mwabona.

Aboobo Nda mulumba balombwana baniini, a moyo wangu onse.

⁹ Ndi yanda kulumba umwi aumwi wanu, ku ciindi eci cibotu ca luswaanano, Mukwesu Leo a Gene. Aya akali mazuba otatwe ncobeni akukombela, kuli ndime. Akwalo musokwe, cindi Nda sola kulilekela lwangu kuunka a kuyeyya kuti Nda kali kuvwima, Mebo munzila imwi na iimbi, Nda mulanga a kumumvwa kwaambaula. Nda jisi coolwe masikati aya ca kuswaya miinzi yanu. Nsena kubona, akweenda mukati ka umwi, Njo wiita kuti munzi, kuti Nda kasoka kubona miinzi minji, isalala aisumbula a bantu, a bulemu bunji loko kuli Kristo a Makanimabotu. Ta—Ta ndina cibwene ku busena buli boonse. Alimwi ncobeni mwaka talikila a lweendo luli kabotu, kozumanana buyo kweenda nkabela Leza uya kuba anduwe. Alimwi Nde elede kuya kubona bamwi banu. Nda kabona, buzuba bumwi, aba bacizi, Nse kabazyi akwalo, nkaambo koonse Nkwe kakonzya kubona inga kwaba buyo kujatikizya meso abo a mpemo, kuzwa kunsi lya ntaulu ezyo. Elyo lino Nda syoma Ndili muzyi kabotu, kwiinda mu bulongwe abulome bwa Mukwesu Leo a Gene, abo baka nditolola koonse a kuswaya miinzi yanu; a kusukana maanza a i—i bana baniini, i basinsimi a banakazi ba bukkalo buboola, ikuti na kuli bukkalo buboola.

¹⁰ Nywebo mulizi, Jesu ula bayanda bana baniini. Nywebo mulizi, Ula cita. Elyo kwakali mulombe muniini, ciindi cimwi

wakaulikidwe kuti Musa, tuyo ambaula kujatikizya nguwe mukati aniini buyo. Elyo wa kali mubotu loko... Nywebo mulizi eco caka mubamba, kugwasigwa ku mubamba kuba mulombe mubotu? Wa kajisi banyina babotu baku mukomezya. Mwabona, eco ncencico. Waa kamuiisya kujatikizya Mwami. Elyo nywebo no balombe a basimbi muli jisi musyobo nguwenya wa bamatumbu baku mukomezya, ku muyiisya makani aa Mwami. Amu baswiilile buyo.

¹¹ Nywebo mulizi cintu, nywebo mulizi obo Mulao mutaanzi mbo ubede mu Bbaibbele, i Mulao mutaanzi ujisi cisymezyo, a cisymezyo? Ndiza nciyumu aniini kuli ndinywe kumvwisywa Milao eyi. I Mulao mutaanzi, ngu, "Kutali kuba a kaleza kambi kali koonse pele Nguwe." Pele Mulao mupati... Alimwi Mulao mutaanzi oyo ujisi cisymezyo kuli nguwo, mwabona, ngwa ku bana. Sena mwakalizi obo? Hmm? Wa kati, "Nobana, amuswiilile bazyali banu, kuti mupone mazuba manji aa nyika, kayo Mwami Leza wanu nga kamupa." Kuswiilila bazyali banu akucita eco ncomu cita, inga cakupa buumi bulamfu aa nyika, obo Mwami mbwa kamupa, ciindi cinji caku Mu belekela.

¹² Nda syoma, sunu, kuti Ndi langide ku cikama ca bakambausi a baimbi a bavangeli bwa buzuba obo bweelede kusika, ikuti na kuli buzuba kwa kwiinda bwesu.

¹³ Elyo kuli cintu comwe biyo atala awa, ula—ula jaya mulombwana ujisi luse. Nda kalya mane Nse kakonzya kulya, alimwi Nse—elyo Nse kalanganisigwa maningi. Ikuti ni Nda kali Angelo, kaloka kuzwa ku Julu, ni Nda taka langanisigwa kabotu kapati kumwi. I cintu buyo nce Ndi konzya kwaamba kuli ndinywe, ngu, "Nda mulumba." Elyo cindi mwanoooli kumusanza ku nzila yaku Tucson, kwayanda Nse konzyi ku lmuanganya kabotu obo, nkaambo Nse zyi nzila; Nse jisi ziyanza zya kucicita, pele Njo cita ku bubotu Mbwe konzya. Kuseluka.

¹⁴ Mukwesu a Mucizi Shantz, Ndi yanda ku balumba ncobeni. Elyo Nda kajisi coolwe caku swaana mwana wako musimbi, mubotu mukubusyi, a mwana mulombe, masikati aya. Elyo—elyo ku tulekela kuba a muunzi wakwe okuno kujuka ku kukombela. Kwakali zintu zili boobo zyakali kucitika mu buzuba bwa Bbaibbele, nywebo mulizi, kuti Makanimabotu akali... Ndi lizi cakali mvwisywa aniini loko. Swebo, inga twa yeeya kuti embo. Pele eci ncimwi buyo mbuli Leza... kuli Leza, mbuli mbo bakabede mu buzuba obo.

¹⁵ Amuyeeye, ikuti na kwaba myaka imbi minji, niba kacebukila awa a kuti, "Ikuti ni Nda kapona buyo mu mazuba kutala kuya ku Prescott! Ikuti ni Nda kapona buyo..." Mwabona? Lino tu pona mu buzuba obo. Mwabona? Mpawo twa selemukila ku mamanino aa lweendo, mpawo tula lindila bulumbu bwesu ku Buzuba bupati.

¹⁶ Lino tuyu jula Ijwi lya Leza a kubala. Pele katutana buyo kucita, atu kanane kuli Nguwe asyoonto buyo.

¹⁷ Oyandwa Jesu, Nse konzyi kupandulula kulimvwa kwangu—kwangu a kulumba kwangu ku Mukwesu Mercier, Mukwesu Goad, a bantu aba boonse a bana babo baniini, obo mbo bali basibuuya kuli ndiswe kuzwa nitwali kokuno. I buuya bula indilila ku cintu cili coonse nco tulangila. Elyo tu lizi kuti bakali babotu a babotu. Pele tii twa kazi kuti tuyu langanisigwa mu nzila iini ya kusyomeka. Elyo, Mwami, Nda komba kuti Busyu Bwako lyoonse buyooba mu cilawo eci ca bantu, i Muuya Uusalala uyo zuzya myoyo yoonse awa, nkabela Uyo bapa Buumi Butamani. Elyo akube kuti swebo, mbuli mbo tu botelwa sunu, akube kuti kube Buzuba butagoli kuti cindi tuyu swaangana mu Busyu Bwakwe Oyo ngo tu komba a luyandisy, a kupa kulumbaizya koonse ku zintu ezi. Mane ciindi eco, Mwami, kotubamba cakusyomeka kuli Nguwe a ku Ijwi Lyakwe. Mu Zina lya Jesu twa lomba. Ameni.

¹⁸ Lino, Nda mujata kwa ciindi cilamfu cifumo cino, Ndiyo sola a kucibamba kufwambaana loko masikati aya, a kwaambaula mu nzila eyo inga yaba ku balombwana baniini, a bapati maningi bayo mvwisya, abalo.

¹⁹ Ndi yanda kubala i—i Lugwalo awa, lujanwa mu Bbuku lya Musalali Marko, elyo Ndi yanda kubala kuzwa ku kampango ka 17 ika cipati 10 ica Musalali Marko, cibeela.

Elyo cindi na kaunka mu nzila, mpaawo kwakasika umwi kazusa, a kufugama ansi a kumu buzya, kwaamba kuti, Simalela Mubotu, ino Ndi cite buti kuti Nka konzye kukona buumi butamani?

Elyo Jesu waka mwaambila kuti, Ino undaambilila nzi kuti mubotu? taakwe mubotu cita omwe, nkabela walo ngu, Leza.

Yebo uliizi milao iiti, Uta citi bumambi, Uta jayi, Uta bbi, Uta pi kaambo cakubeja, Uta citi cabumpelenge, Kolemekwa uso a banyoko.

Elyo wa kaingula a ku mwaambila kuti, Simalela, yoonse eyi Nda kaicita, kaitobela, kaibamba (mubwini) kuzwa ku bwana bwangu.

Mpawo Jesu naka mulanga waka muyanda, oyu mulombwana mukubusyi; elyo wa kati kuli nguwe, Cintu comwe ncobulide: koya mu lweendo lwako, ukasambale kufumbwa cintu nco jisi, a kupa bacete, nkabela uyooba a lubono ku julu: a kuboola, kubweza ciingano cako, akundi tobela.

Elyo wa kausa ku kwaamba oku, nkabela wakazwa kabijilizwe: nkambo wa kajisi lukono lunji.

²⁰ Lino ku bana, a ku bapati a boonse, Ndi yanda kubamba Mulumbe oyu muniini ca kwelela buyo mbuli Mbwe konzya, alimwi cakufwambaana mbuli Mbwe konzya. Elyo Ndi yanda kubweza cibalo, “Ndi tobele,” alimwi Ndi yanda kubweza ciyo: *Busololi*. Kutobela, a muntu umwi kusololela; *Busololi*, a “Ndi tobele.” I bakibusyi, bantu, i . . .

²¹ Amuyeeye kuti, ntaamo ntaanzi eyo umwi wesu njia kasola kubamba, muntuumwi waka tusololela. Nywebo no bamatumbu mula yeeya ntaamo zitaanzi ezyo junior a musimbi muniini nzyakapanga, nkabela taba ciyeyi limbi. Pele muntuumwi waku sololela ku ntaamo yako ntaanzi. Nda yeeya Billy Paul cindi naka bamba ntaamo yakwe ntaanzi, Joseph a boonse babo, cindi niba kabamba ntaamo yabo ntaanzi.

²² Walo mutumbu kanji oyo uubamba kusololela mwana ku ntaamo yakwe ntaanzi, nkaambo walo muunzi kuciindi taata nabeleka, kasola kubamba zya kuponena. Pele, cili, bala bamba ntaamo yabo ntaanzi. Elyo ku ciindi camasiku cindi banjila, taata, lyoonse ulaamba. “Oh, taata,” waa kati, “Johnny a Mary,” mulombe na musimbi muniini, “inga weenda! Boola ulange!” Elyo ntaamo yomwe buyo, ndiza baama bakacita kujatilila; waka jatilila munwe wa mutumbu, nkaambo wakali kubaanga wakompeme, a kubaanga nkunyona ku lubazu, nywebo mulizi, a kuwida ansi aniini. Aboobo wakacita kujatilila ku janza lya baama, ku kubamba ntaamo yako ntaanzi.

²³ Lino, muntuumwi waka kugwasya, cindi noka bamba ntaamo yako ntaanzi. Elyo ntaamo yako—yako ya mamanino njo kasola kubamba mu buumi, muntuumwi uno kusololela. Mwabona, mbo mbubo. Ndi yanda kuti tuyeeye eco. Ntaamo yako ntaanzi, muntuumwi waka kusololela. Elyo ntaamo yako ya mamanino, muntuumwi uyo kusololela.

²⁴ Twe elede kusololelwa. Nywebo mulizi, Leza waka tukozyanisa ku mbelele. Elyo sena mwakalizi kuti mbelele tai konzyi kuli sololela lwayo? Uyo tuntulika a kuleya, alimwi ta—ta konzyi buyo kuli sololela ini. Elyo yeelede kuba a muntuumwi wakwi sololela. Elyo ciindicimwi . . . I mweembezi weelete kusololela mbelele. Lino eco cakali kaindi mu mazuba aa Mwami Jesu, Wa kali Mweembezi mubotu waka sololela mbelele.

²⁵ Pele sunu, nywebo mwabona, tu pona mu buzuba bumbi, zintuzyonse zya cincwa a kupilingana. Nywebo mulizi eco muntu ncaelete kusololela mbelele sunu? Ii mpongo. Elyo mulizi oko mpongo eyo nkisololela? Moonya mu cijailo. Zyalo mbelele ziniini tazizi oko nko ziinka, aboobo mpongo ilaunka mujulu ii—ii cimpatti, kutala ku cijailo, elyo mbelele zizi buyo mbuli kutobela musololi, aboobo ila zisololela moonya mu cijailo eci. Elyo mpawo mpongo ila sotokela mu mukondo, nkabela mbelele ila njila a kujaigwa. Mwabona, mpongo, musololi ulubide.

²⁶ Pele Jesu, Mweembezi mubotu Oyo waka sololela mbelele, Wa kaba sololela ku Buumi a kujata maanza abo. Mwabona, pele muntuumwi weelete kusololela mbelele.

²⁷ I lutaanzi nduzyalo lwa mutumbu, mpawo ijwi lya bawisi. Mutumbu aamana kukupa ntaamo yako ntaanzi, mpawo ula langa kuli bauso, toonse swebo, ku kujana busongo, nkaambo ngo mutwe wa ng'anda. Elyo kanji wa... Kutali kuti walo musongo loko, pele walo-walo wakabambwa kuba musololi wa mukwasyi wakwe, aboobo tu tobela eco taata wesu ncaamba kucita. Cindi aamba kuti, "Lino, mulombe, Ndi yanda kuti ucite cintu cili *boobu-boobu*," mpawo tula muswiilila nkaambo mbusongo. Pele amuswiilile, mwabona, wa kaiya kunji loko alimwi tweede ku mubuzya, kubona eco nca kaiya, elyo mpawo inga twa gwasya kwiinda kuli yakwe, eco nca kaiya. Ula twaambila, "Lino muta unki a kucita *ceeci*, nkaambo Nda kacita ceeco. Bataata baka ndaambila kuta cicita, pele Nda kacicita, nkabela cakaleta *ceeci* kucitika kuli ndime, cintucimwi cibyaabi." Aboobo, mwabona, tuy... Mpawo walo, taata, ula twaambila nzila ya kucita, a cintu cakucita ciluleme.

²⁸ Mpawo mutumbu amana kutu sololela, mane ciindi no tweede kuba a busongo buniini, bwa kumvwisy, kuzwa kuli taata, mpawo tu jana bumbi. Tu jana musololi umbi, alimwi oyo mwiiyi, mwiiyi wa cikolo cibotu. Ula sola ku kuyiisya a kukupa lwiiyo, lwaku kweelela kabotu mu bumi, ku busena, cilao nco konzya—nco konzya kubala Bbaibbele lyako alimwi inga wabala nyimbo, alimwi inga waiya kwa Leza a kubala, lwako, yebo wabona. Elyo mpawo, cintu cimbi, ndiza uno jisi mpindu, nkabela muntuumwi wakulembela lugwalo, baama, bataata, muntuumwi akulembela lugwalo, inga tokonzya kulubala. Mwabona? Aboobo mwiiyi, uli jisi mpawo, alimwi uku sololela ku—ku—ku kwiiya kulemba a kubala. Elyo ncintu cibotu, mwiiyi mubotu, ku kuyiisya kabotu. Pele lino wamana kusiya ceeco, yebo, wamana kusiya mwiiyi, mwiiyi omwe kutobela umbi, kuzwa ku bulumbu bunini, giledi liniini litaanzi, kuyabuya mane wazwa ku cikolo cipati na kuya ku kkolegi. Mpawo cindi wazwa ku kkolegi, elyo mpawo mwiiyi wamanizya ku kusololela. Mwabona?

²⁹ Lino, baama baka kuyiisya kweenda, wabona. Taa waka kuyiisya nzila ya kuba a mwaalumi mukubusyi mubotu musongo, a nzila yakuli mamela lwako a kulilemeka lwako. I mwiiyi waka kuyiisya lwiiyo, nzila ya kubala a kulemba. Pele lino uli mukusiya taata, uli mukusiya baama, elyo uli mukusiya mwiiyi, lino muntuumwi weelete kukutola kuzwida awa. Lino nguni ngo yanda kukutola kuzwida awa? [Ii mwana waamba, "Jesu."—Mul.] Mbo mbubo. Jesu, ku mutola kuzwida awo. Lino, obo mbo bwiinguzi bubotu loko, bubotu loko. Jesu ula kutola kuzwida awo.

³⁰ Lino mwabona mulombwana oyu mukubusyi ngo twaambaula, walo wiitwa kuti mweendelezi muvubi mukubusyi. Lino, oyu mulombwana, wa keenzegwa kabotu loko. Lino, banyina baka muyiisya kweenda. Elyo, nywebo mwabona, wa kacili mwaalumi mukubusyi, ndiza kuzwa buyo ku cikolo cipati, alimwi mwaalumi mukubusyi wampuwo loko. Elyo kwiinda mu kuiisigwa kabotu, ndiza wakeenda kabotu, azimwi zimbi, obo banyina mboba kamuiisya.

³¹ Elyo wa kali i—i mwaalumi mukubusyi uzwidilide, awalo, nkaambo, amulange, wa kali vubide kale. Elyo wa kali buyo i—i mwaalumi mukubusyi, ndiza myaka ili kkumi alusele yakukomena, kuzwa buyo ku cikolo cipati, nkabela wa kali vubide. Lino, nywebo mwabona, wa kajisi musyobo ululeme wa mwiiyi ku muyiisya kweenda kabotu. Elyo wa kajisi musyobo ululeme wa mwiiyi, wisi wakwe; mane akwalo kacili mwaalumi mukubusyi alimwi wa kali—wa kali vubide mu mali, wa kamupangila mali manji. Kwayanda wakali wini... Wa kali mweendelezi, akwalo ku musela oyo, kazwidilide maningi. Mwabona? Elyo lino wa kajisi ii—ii mwiiyi waka muyiisya, kamuiisya cintu ciluleme, nzila mbwa kali kuyo... Wa kajisi lwiiyo lwakwe.

³² Elyo mpawo mwiiyi umbi oyu mwaalumi mukubusyi ngwa kajisi, eco ciyaamina buyo obo mbo komezegwa, pele oyu mwaalumi mukubusyi waka jisi lwiiyo lwa bukombi mu ng'anda yakwe.

³³ Lino, bana bamwi, sena mwakalizi kuti kuli bana banji baniini bata jisi lwiiyo lwa bukombi luli loonse ku muunzi? Bawisi a banyina taba syomi muli Leza. Elyo bawisi a banyina, balanywa, kufweba, kulwana, a kweendauka, kuli umwi aumwi, masiku, a zintu, akuta jikila bana babo baniini balombe a basimbi zilalilo, a zintu. Sa tamu kkomene kuti muli jisi bamauso aba mabanyokwe Banakristo babotu? Lino, cindi mwaakuba a bana, sena tamu kayandi kuba musyobo nguwenya wa bamauso a bamanyokwe mbuli bamauso a bamanyokwe mbo babede? Mwabona? Lino, pele oko koonse kuli kabotu.

³⁴ Lino, oyu mwaalumi mukubusyi waka jisi, alimwi wa kajisi lwiiyo lwa bukombi. Mwabona, eco cakali kwiindilila loko kuli ceeco bamwi babo ncoba kajisi, nkaambo taba jisi lwiiyo lwa bukombi. Pele oyu mwaalumi mukubusyi waka jisi lwiiyo lwa bukombi, nkaambo, mwabona, nkaambo wa kati wa kabamba Milao kuzwa na kali mulombe.

³⁵ Lino nyoonse muli jisi bamaiyi babotu bakombi, anywebo, umwi aumwi wanu. Elyo nywebo nobasimbi baniini bakubusyi a balombe, nyoonse mwaka jisi bamaiyi babotu, bauso a banyoko awa mu cilabba eci, jisi zintuzyonse nzo... kukonzya koonse oko nkozi, kula konzeka, kuli nduwe kubamba mwaalumi a mwanakazi mubotu loko, mulanda kuli Leza.

³⁶ Nkaambo, amuyeyeye, muvo fwa buzubabumwi, na kwalo kutolwa ku Julu. Elyo ikuti na wafwa kakutanaba Kuboola Kwakwe, uyo kwempwa lutaanzi. Sena mwakalizi obo? Sena mwakalizi kuti abo bakafwa . . . Ikuti na baama a bataata bafwa kamutana kucita, a Jesu tabooli mu nzyalani yesu, sena muli bazi aba, taata a baama, bayo buka lutaanzi, cabulemu, kumbele lyanu? Mwabona? I mweembo wa Leza uyo lila, nkabela bafu muli Kristo bayo buka lutaanzi, elyo mpawo swebo to baumi a basyeede tuyu kwempwa ambabo. Tuyo cincwa mbuli boobo. Twe elede kuyeyya, eco nce cintu cipati mu buumi. Mwa mvwisya lino? Eco nce cintu cipati mu buumi, tweede kucita, nku libambilika kuswaana Leza.

³⁷ Lino, bukombi buyo tabu kabeleki. Mwabona, oyu mweendelezi mukubusyi awa, wa kati, "Simalela Mubotu . . ." Lino amuyeyeye, Nke tana ku caamba. Wa kayisigwa kweenda kabotu. Wa kajisi lwiyo lubotu. Wa kayisigwa makwebo. Elyo wakali vubide, alimwi wakali mweendelezi, alimwi wakali jisi bukombi. Pele wa kalanganwa a penzi limbi, alimwi ula tulanganya toonse, Buumi Butamani. Bukombi tabupi Buumi Butamani. Bukombi, ncivumbyo, pele tabu tupi Buumi Butamani. Elyo nekubaboo, wa kayisya a bamaiyi bainda bakaliko, wa kacili kuyandikana cintucimwi. Elyo mwaalumi mukubusyi waka ciziba, nkaambo wa kati, "Simalela Mubotu, ino inga Nda citanzi kukona Buumi Butamani?"

³⁸ Lino, nywebo, mula syoma kuti Jesu ngu Leza, embo na? Aboobo Wa kalizi miyeeyo ya mwaalumi mukubusyi, aboobo Wa kati, "Kobamba Milao." Wa kajokela nkoonya ku bukombi bwakwe, kubona eco ncakali kwaamba kujatikizya bukombi bwakwe. Wa kati lino, mu majwi amwi, "Kobamba bukombi bwako."

³⁹ Wa kati, "Nda kacita eci, kuzwa ku bulombe," balombe baniini mbuli nduwe. "Baama a bataata, a mupaizi wangu, baka ndiyisya bukombi. Pele Ndi lizi, mu bukombi bwangu, kuti Nse cijisi Buumi Butamani." Mwabona?

⁴⁰ Inga koli mubotu. Uta bbi. Uta fwebi. Uta beji. Uta beji kuli bataata a baama. Uta ambi bubeji obo butaanzi, nkaambo, umwi waamba omwe, mpawo ncitete kwaambila umwi umbi, mwabona. Pele ta mweelede kucita ceeco. Muta ambi umwi mutaanzi.

⁴¹ Sena mwakalizi kuti mubili wako tau bambidwe kubeha? Nywebo mulizi, ba jisi cilwazi lino, cili—cili mu nsinga zyako zyaboongo. Inga ba kabikka kabbango kaniini ku kuboko kwako awa, aku bikka kamwi ku mutwe wako, elyo mpawo inga waamba awo, kwaamba yebo watu, "Nda—Nda—Nda kubeha kujatikizya ceeco, pele inga Nda caamba cabuteteete loko kuti bayo—bayo syoma kuti Ndi caamba bwini." Elyo inga waamba . . .

⁴² Ba kali kunga bati, “Sa wakali ku busena bumwi, mbuli mbo kakkala mu trela ya Mukwesu Shantz, kuciindi Mukwesu Branham naka kambauka, Munsono masikati aa buzuba obuno?”

Elyo yebo wat, “Peepe, munene. Nse kakkala awo. Peepe, munene.”

⁴³ Nywebo mulizi eco cibelesyo cakuziba bubeji nco ciyo amba? “Iiyi, munene, wa kacita. Iiyi, munene, wa kacita.”

Yebo wat, “Nse kacita.”

Ciyo amba, “Iiyi, wa kacita.”

⁴⁴ Nkaambonzi? Nkaambo bubeji ncintu cibyaabi. I mubili tii waka bambwa kubeja. Elyo ncintu ciyoosya, kusikila cinyonganya bweende boonse bwa nsinga zyakuyeeyela, cindi wa beja. Fyuu! Kunyonganya mbuli booboo, uyo kupa zilonda, cikoto ca fangasi, inga cakujaya. Elyo mpawo bubeji ncintu cibyaabi, nkaambo, mwabona, ta mweelede kubeja, kubba, kucita cimwi ca zintu ezi.

⁴⁵ Lino, aboobo oyu mwaalumi mukubusyi antela wakali... ta kabeja, ta kabba, alimwi wa kali kutweluka kuti wa kali kuyandikana lyonse... Buumi Butamani. Aboobo wa kati, “Ino inga Nda citanzi kuba a Mbubo?”

⁴⁶ Elyo Jesu ulatondezya awa lino kuti bukombi tabu kacici. Aboobo Wa katuma nkoonya kujoka kuli nguwe, a kuti, “Kobamba Milao.”

⁴⁷ Wa kati, “Simalela, Nda kacita eci kuzwa ni Nda kali mulombe muniini, na muniini, cindi muntu buyo muniini loko Ngwe kacita ceeci.” Pele wa kalizi kuti taka jisi Buumi Butamani. Aboobo Wa kati mpawo, “Ikuti na uyo njila mu Buumi, Buumi Butamani, yanda kulondoka, mpawo koya ukasambale eco...”

⁴⁸ Mwabona, lino, cili kabetu kuba a mali. Mwabona, cili kabetu kuba a mali, kovubide. Elyo amube mweendelezi, eco cili kabetu. Pele ni—ni nzila mbo lilemeka wamana kuba booboo, mwabona.

⁴⁹ Wa kati, “Koya ukasambale ezyo nzo jisi, a kuzipa ku bacete, balo bantu abo batakwe cintu cili coonse; mpawo boola, Ndi tobole, nkabelu uyooba a lubono ku Julu.” Pele mwaalumi mukubusyi waka jisi mali manji loko kusikila ta kazi acakucita ancico. Lino, mwabona, wa kali ampuwo maningi, oyo mwaalumi mukubusyi mbwakabede.

⁵⁰ Elyo wa—wa—wa kali libambilide kabetu ku buumi, nzila bawisi a banyina, elyo bapaizi a boonse babo, bakamupede zyakubelsya, pele nekubaboo wa kalizi kuti wakali kuyandikana cintucimwi. Lino Nda ambaula ku bapati. Wa, wa kalizi kuti wa kali kuyandikana cintucimwi, alimwi ta kajisi Buumi Butamani. Wa kali cizi. Mwabona?

⁵¹ Bukombi tabu kazyali Buumi Butamani. Ziwa, kunyanyamukwa, ula cimvwa cintucimwi; ula—ula konzya kuyoowa, a kumvwa cintucimwi. Mwabona? Kulila, eco ncibotu; koongolola, eco ncibotu; pele nekubaboobo tacili Ncico, mwabona. Ula langanwa a Buumi Butamani.

⁵² Yebo wati, “Ee, Ndali muna Baptisti usinizizye, na Methodisti, na Presbyteria, na Pentekoste.” Oyo tauli mubuzyo nekuba.

⁵³ Oyu mwaalumi mukubusyi wakaliko, awalo, wa kayiisiga mu bukombi bwa buzuba, pele nekubaboobo tako jisi Buumi Butamani, aboobo wa kali kuyanda kuziba eco cakucita. Wa keenzegwa kabotu, kuli Ceeci. Pele cindi na kalanganwa a Nguwo, wa kakaka kweenzegwa ku Buumi Butamani, na kusololelwa. Basololi bakwe bambi baka jisi kujatilila maningi kusikila takali kuyanda ku cilekezya. Mwabona?

⁵⁴ Lino, eco ncintucimwi mbuli ceeco Mukwesu Branham ncaamba. Cila sakana aniini kuli nduwe, wabona.

⁵⁵ Lwiiyo luli kabotu, mweelede kuya ku cikolo kuya kwiiya. Mwabona, eco ncibotu, pele eco ta cika kufutuli. Kuba a mali manji, eco ncibotu, inga wakomezya bana bako, kubapa zisani zibotu a zintu. Elyo mbuli taata a baama mbo bakabelekela ndinywe nyoonse, a zintu. Eco ncibotu, pele nekubaboobo eco tacika mufutuli. Mwabona? Na, inga wanjila mu labbolatori a kwiiya mbo kubikkwa zintu zyandeene antoomwe, na kupasaula maatomu, na kufumbwa no bacita, a—a kunjila mu ii—ii rokketi a—a kuya ku mweezi, pele eco tacika mufutuli.

⁵⁶ We elede kulanganya cintu comwe, Buumi Butamani, alimwi kuli Muntu omwe luzutu Oyo ukonzya kupa Boobo kuli nduwe. Baama taba konzyi Ku bupa kuli nduwe. Bataata taba konzyi Ku bupa kuli nduwe. Mweembeli wako takonzyi Ku bupa kuli nduwe. Musololi wako awa takonzyi Ku bupa kuli nduwe. Bantubonse abo bajana Buumi Butamani beeleder kuboola kuli Jesu Kristo. Ngo Nguwe alikke Oyo ukonzya kupa cibeeala Eco.

⁵⁷ Mwiiyi wako inga wakupa lwiiyo, ula konzya ku kuyiisya; weeleder ku lwiiya. Banyoko bako—bako inga ba kuyiisya kweenda; we elede kwiiya kweenda. Bauso inga ba kuyiisya nzila yakuba simakwebo, na cintu; weeleder kwiiya eco. Pele Jesu alikke ngu konzya kukupa Buumi Butamani. Mwabona?

⁵⁸ Mupaizi wako, musololi wako, na zimwi zimbi, inga wa kuyiisya bukombi bwako, inga waiya Mulumbe oyo ngo tusola kuyiisya, pele nekubaboobo eco taukakupi Buumi Butamani. We elede kuzumina Muntu, Jesu Kristo. Mula mvwisya eco, nyoonse nywebo? Weelede kuzumina Muntu, Jesu Kristo, kuba a Buumi Butamani. Lino, pele zindizimwi busololi bumbi buba koongelezya kupati ali ndiswe mane ta tuzi cakucita mpawo cindi eco—eco ciindi casika.

⁵⁹ Lino, ino ncintu cibyaabi caka kaka busololi bwa Buumi Butamani, nkaambo, mwabona, obo Mbuumi buta konzyi kugola. Lino, lwiiyo, eco cili kabotu, eco ciyo tugwasya awa. Makwebo, ayo ali kabotu. Mali, ayo ali kabotu. Kuba mulombe a musimbi mubotu, eco cili kabotu. Pele, nywebo mwabona, cindi buumi bwamana ano, kwa mana. Mula mvwisya na? Nywebo nobapati mwa mvwisya? Mwabona, kwa mana. Pele mpawo tweede kutambula Jesu Kristo, ku Buumi Butamani. Jesu alikke ngu konzya ku kusololela kuli Boobo.

⁶⁰ Elyo nekubakuti, mwabona, oyu mwaalumi mukubusyi waka zwidilila zintu ezi zyoonse mu cikolo, alimwi kwinda ku bazyali bakwe a zintuzyonse, wa—wa kasweekelwa cintu cipati maningi eco nca kali kukonzya kuba aco, busololi bwa Muuya Uusalala, nkambo Jesu wakati, “Bool, Ndi tobele.”

⁶¹ A limwi nobasimbi nomuzwaa kumanizya zikolo, muyo manizya antela, no bamwi, cakufwambaana, alimwi nywebo no balombe bakubusyi; busololi bupati maningi buli ngu Jesu Kristo, nkambo obo Mbusololi ku Buumi Butamani. Lino, obu Busololi bulalanganya muntunsi oonse, bala pegwa ciindi ceelede ca kusala.

⁶² Elyo eco ncintu comwe cipati nco tujisi mu buumi, oko nkusala. Buzubabumwi... Yebo ulizi, bataata a baama, ba kasala kuba a mulombe muniini mubotu a musimbi, mbuli mbo—mbo bede nyoonse.

⁶³ Mpawo, yebo—yebo uli jisi nguzu, kwainda kaindi, kusala naa uyanda kwiiya kuzwa ku mwiiyi, na pe. I mwiiyi inga wa kuyiisya, pele inga waba buyo ii—ii mulombe muniini mubi, toka kaiyi pe; musimbi, muniini mubi, takaswiliili pee. Mwabona, uli—uli jisi kusala kwa kucita ceeco, nekubakuti uli muniini.

Alimwi baama bat, “Seba wajana ma A ali ripooti kkadi yako?”

“Peepe, Ndi jisi kulaansi loko.” Mwabona, lino ula konzya...

⁶⁴ Baama bat, “Lino weeede kubala.” Elyo weeede kucita ceeco mpawo, kuzumanana kubala mbuli baama mbo baka kwaambila, mbuli taata mbwa kakwambila. Wabona, weeede kubala.

⁶⁵ Pele uli jisi kusala, ula konzya kucicita na kuta cicita. Ula konzya kwaamba, “Nse yandi kucita.” Mwabona, uli jisi kusala.

⁶⁶ Kwainda kaindi, uyooba a kusala kwa musimbi oyo ngoya kukwata, mulombe oyo ngoya kukwata.

⁶⁷ Uli jisi kusala konse mu buumi. Elyo mpawo uli jisi kusala, alubo, ku naa uyanda kupona kwamana buumi obu; na kuba buyo muntu, mubotu simpuwo, sikusobana mu zipekupeku, na sikuzyana, na cintucimwi cimbi.

⁶⁸ Elyo amulange basimbi aba baniini awa a jwi eelyo bbotu, kaindi kainda, kabaimba. Oyo mwana wakacita kubambila jwi eelyo, alimwi inga waba mwiimbi wini, na mwiimbi umwi. Nda mvwa majwi aa balombe aba baniini, balombe aba, inga waba mbuli Elvis Presley, kusambala bupati bwako. Wabona, to yandi ceeco. Mwabona, ndi talenta Leza ndya kakupa, alimwi weelede kusala umwi, oko nkoya kubelesya talenta eelyo, nkambo Leza, na uyo libelesya nkambo ka dyabulosi. Mwabona?

⁶⁹ Mukwesu Leo awa, munyoko, mwabona, lino wa kajisi talenta, kubaanga nku solelela bantu. Lino ino uyo citanzi a ncico? Sena uya mu makwebo kuti akalibambe kuba simamilioni; na sena inga wa boola awa a kubamba muunzi oko bantu nko bayanda kuboola antoomwe a kubweza nyoonse nobana baniini? Mwabona, weelede kusala eco ncoya kucita.

⁷⁰ Umwi aumwi wesu weelede kusala. Alimwi cila tulwana. Pele toonse tula langanwa a cintu eci comwe: “Ino tuyu citanzi kujatikizya Buumi Butamani? Tuyo pona kumbele, na pe?” Mpawo tweede kuboola kuli Jesu, kujana Ceeco. I coolwe ca kusala, eco nce cintu comwe Leza nca katupa. Ta sungilizyi cintu ali ndiswe. Ula tulekela buyo kubamba kusala kwesu. Aboobo ta mweelede kusungilizigwa, pele kubamba buyo kusala kwanu kwini.

⁷¹ Lino atu tobele buyo oyu, bapati a boonse lino, kwa maminiti masyoonto, a bana, boonse antoomwe. Atu tutobele mwaalumi oyu mukubusyi, a kusala oko nkwa kabamba, a kubona oko nko caka musololela.

⁷² Lino, aba basimbi a majwi ayo mabotu, aba balombe baniini. Lino ndiza waboola a kuba nduwe inga waba a jwi ly a kwiimba. Lino amubweze buyo cintu eco comwe, inga mwacita, ma, inga buzubabumwi kwayanda uya kulitola, “Ndi . . .”

⁷³ Nywebo mulimuzi mulombe oyu uitegwa Elvis Presley? Mwa kaamvwa mateepu angu. Mwa kamvwa nzila Mbwe taubausyi mulombe, pele mulombe oyo wakali jisi coolwe eco nyoonse ncomu jisi. Mwabona, a ceeco nca . . . Wa kajana kuti wakali kukonzya kwiimba. Elyo amulangilile eco nca kacita, cintu nciconya buyo Judasi nca kacita, Judasi Iskarioti, wa kasambala Jesu. Jesu wakapa mulombe oyo jwi bbotu. Elyo ino ucita nzi? Amucenguluke a kucisambala kuli dyabulosi. Mwabona, we elede kuboola ku mamanino aa lweendo. Mwabona? Wa kakaka kweenda a Jesu.

⁷⁴ Lino oyu mulombwana mukubusyi awa, oyu mweendelezi mukubusyi muvubi, wa kacita cintu nciconya. Atu tobele a kubona eco nca kacita. Kwiina kuzumbauzya, a mutu mulemu oyo mbwa kabede, antela mwaalumi mukubusyi mubotu, masusu asiya kaabambidwe kabotu ku lubazu, zisani zibotu. I balindu bakibusyi bakayeeya, “Mulombe, oyo mwaalumi mukubusyi mubotu!” Oh, inga ba . . . Inga ambweni watambika

kuli mbabo, nkabela kwayanda bakali kuli bbwayaaula cankwela kuli nguwe, a zintu.

⁷⁵ Elyo wa kayeeya kuti wakali mulombwana mulemu, muntu, mwabona, nkaambo wakali kweebeka, wa kali mukubusyi. Ta kali kulanga ansi okuya ku mamanino aa lweendo. Wa kali kulanga buyo awa. “Ndili mukubusyi. Ndili mubotu. Ndili vubide. Nda konzya kuula kufumbwa cintu Nce yanda. Nda konzya kubweza basimbi aba, alimwi, mulombe, boonse bala ndiyanda. Elyo ba lizi kuti Ndili muntu mulemu.” Elyo, mwabona, wa kali jisi zyoonse ezyo. Wa katobela malailile aa bawisi, a zintuzyonse. “Elyo Ndili mukombi loko. Nda unka ku cikombelo.” Elyo lino wa kali kukonzya kutobela ceeco, mwabona; mpuwo loko, uvubide, a uzizilwe. Elyo, elyo wa . . .

⁷⁶ Mbuli buyo sunu, mbuli kuti mwakali jisi ciindi ceelede ca kuba sikusangabalisyia wamu zipekupeku, mwabona, na cintucimwi mbuli ceeco. Bunji bwa bana baniini sunu, amwaambaule kuli mbabo, ba lizi kunji kujatikizya basimisobano bamu zipekupeku kwiinda mbo bazi kujatikizya Jesu. Nywebo mwabona? Elyo, mwabona, nywebo—nywebo nobana mulaiya kujatikizya Jesu. Awo mpo bakkala, a musobano umwi kababoola aa zipekupeku, na cintucimwi cimbi, ba lizi basyakacite a boonse okuya, koonse kujatikizya ncico. Ba lizi kabotu eco coonse kwiinda Ceeco. Wa baambila kujatikizya Bbaibbele, taakwe cintu nco bazi kujatikizya Bbaibbele. Mwabona, nku bamba kusala kulubide. Lino, mwiimbi umwi kasambala talenta lyakwe lya kapewa aa Leza, nkambo ka mpuwo!

⁷⁷ Mpawo tula mubona ku mamanino aa buumi. Atu mutobebe ambele aniini. Nywebo mulizi eco Bbaibbele nco lyaamba kujatikizya mulombwana oyu mukubusyi? Wa kaba sikuzwidilila maningi. Aboobo, ziindizimwi kuzwidilila ta kwaambi kuti wakabamba kusala kululeme. Sa muli nca kacita? Wa kaunka kubusena elyo wakaba aziindi zyonse zibotu, a kuwaala mapobwe mapati, a kubellesya mali manji a zintuzyonse, aa basimbi a zintuzyonse. Elyo mpawo wa kakwata alimwi ndiza wa kajisi mukwasyi. Elyo—elyo wa—wa kavuba loko mane wa kayaka matala mapya a zintu. Elyo wa kati, “Nywebo mwabona, Nse katobela Jesu, a kulanga eco Nce jisi!” Mwabona?

⁷⁸ Inga wamvwa bantu kwaamba ceeco, alimwi Ndi jisi, “Ee, langa, Wa kandi longezya.” Eco ta caambi coonse. Mwabona?

⁷⁹ Elyo kwiinde kaindi matala akwe aka muzimba kusikila akwalo wa kati, baa, akwalo, “Buntu, kotola kulyookezya kwako. Ndi jisi mali manji loko a kuzwidilila maningi! Elyo Ndili muntu mulemu boobu! Ndi zulilwa ku makkkilabbu onse. Elyo Ndi jisi buvubi bwa inyika mu maanza angu. Ndili jisi nyika

mpati a mali manji, alimwi, baa, ma, okuya bantubonse bala ndiyanda, muntu mubotu loko kuba.”

⁸⁰ Pele nywebo mulizi, Bbaibbele lya kaamba boobo, busiku obo, Leza wa kamwaambila kuti, “Ndiyo yanda buntu bwako.”

⁸¹ Mpawo ncinzi cakacitika? Lino kwakali mukumbizi, Munakristo wakaindi mucete wakalala okuya munsi lya mulyango wakwe. Elyo cindi buyo niba . . .

⁸² Kutala mu Jerusalema, kutala kuya, ba—ba lida aatala lya ng’anda. Elyo tufwefwelenga twa zinkwa katuloka mbuli *boobu*, a tubeela twa nyama, azimwi zimbi, kuuma cibuye cindi batulosya. Elyo taba tubwezi pe, nkaambo zintuzyonse mu Jerusalema, munzi wakaindi, uli—uli . . .

⁸³ Sa kuli kabotu kwaamba kudana kuniini awa? f-o-b. Nywebo mulizi mbo cibede? Nzinini aa cinkwa, nzinini aa nyama nzinini aali bbata, f-o-b, [Tubala twiiminina mu Chikuwa—Mull], nzinini aa zintu zyoonse. Zilla unka mu tugwagwa, mu tugelo a zintuzyonse, akuukulila mukati akuba ali ncico ncobeni.

⁸⁴ Abooobo aba bantu kutala okuya, bala tanta atala lya i—lya buyake. Elyo balalya, elyo mpawo bala losya *eci*, elyo mpawo bapyaanga eco kuzwa. Elyo babwa, mu tugwagwa, balya tufwefwelenga. Elyo wa kalekela oyu Munakristo mucete wakaindi kulala alya mu kagwagwa a kulya buyo tufwefwelenga twa kaloka kuzwa ku mutiba wakwe kuzwa ku bulo bwakwe, na kuzwa ku tafule lyakwe.

⁸⁵ Elyo mpawo cindi na kanjila, kwiinde kaindi, wa kajisi zilonda zinji, alimwi ta kajisi cintu cili coonse cakubikka zilonda zyakwe. Zina lyakwe wakali Lazaro. Elyo babwa bakasika a kumyakuta zilonda zyakwe kutegwa kakonzya kusola kuba kabotu.

⁸⁶ Ee, nywebo mulizi, kwiinde kaindi, oyu muntu muvubi, cindi, wa kabona kuti wa kajisi maliakuula misyobo yoonse ya musamu, ikuti na wa kali cisidwe, kuba a misyobo yoonse ya madokotela. Pele, nywebo mulizi, ziindizimwi madokotela taba konzyi kutu gwasya, musamu tau katu gwasyi, taakwe cintu cikonzya kutu gwasya; tuli ku luse lwa Leza. Elyo wa kaselemuka ku mamanino aa lweendo lwakwe; i madokotela tiiba kakonzya kumugwasya, nkabela ba manarsi tiiba kakonzya kumu gwasya, nkabela musamu tiwa kakonzya kumu gwasya, nkabela wa kafwa. Elyo mpawo cindi buntu bwakwe nibwa kasiya mubili wakwe, mwabona, wa kasiya mali akwe oonse, lwiyo lwakwe loonse, zintuzyonse nzya kajisi, mpuwo yakwe yoonse. Ba kamupa dilwe pati ncobeni, ndiza ndembela yakaungila ansi, elyo—elyo meya wa dolopo wakasika, elyo balo, elyo mukambausi wakasika a—a kuti, “Mukwesu wesu lino wakainka ku Bulemu,” a zyoonse mbuli ezyo.

⁸⁷ Pele Bbaibbele lya kaamba, kuti, “Wa katambya meso akwe mu gehena, mu kupenzegwa, a kulanga kulaale atala lya cigelo

eco cipati okuya, a kubona mukumbizi oyo waka kkede, okuya ku mulyango wakwe, okuya ku Julu. Elyo wa koompolola, ‘Kotuma Lazaro ansi ano a maanzi masyoonto. Aaya mabangabanga alapenzya.’ Kati, ‘Oh, peepe. Mwabona, wa kabweza kusala kulubide mu buumi.’”

⁸⁸ Mwabona, cindi na kaboola ku mamanino aa lweendo, kuzwa mu buumi! Wa keenzegwa aa bukombi. Wa keenzegwa a lwiyo. Wa keenzegwa a koongelezya kwa kuzwidilila kwakwe—kwakwe. Pele, nywebo mwabona, ta kajisi cintu ca kujata janza lyakwe, ezyo zintu zilagola okuya. Ula mwvisya, omulombwana muniini? Nywebo nobapati mulacita. Obo Mbwe bede... Mwabona, ta kajisi cintu caku mujata. Mali akwe taka konzya kumu jatilila. Beenzinyina a madokotela tiiba kakonzya kumujatilila. Musamu tii wakali kukonzya kumujatilila. Mupaizi wakwe, bukombi bwakwe, tii bwakali kukonzya kumujatilila. Aboobo, kwakali cintu comwe biyo kuli nguwe cakucita. Wa kali—wa kakaka kutambula Jesu, Buumi Butamani. Aboobo ncinzi nca keelede kucita? Kabibila kunsi mu lufu, mu gehena. Ino nkulubizya kubyabi oko mwaalumi mukubusyi nkwa kajisi cindi na kakaka kweenda a Jesu, kosololelwaa aa Jesu. Wa kakaka kukucita.

⁸⁹ Bantu banji loko bakubusyi bali mukubamba bulubizi obo, sunu, kukaka kusololelwaa a—a Mwami Jesu. Lino tula bona cintu cibyaabi mbo cibede kukaka Buumi Butamani a kusololelwaa aa Jesu, Busololi, cindi Na kati, “Bool, Ndi tobele.”

⁹⁰ Mwabona eco mwaalumi oyu muniini mubotu nca kaamba masikati aya? Cindi wazwa ku cikolo, cindi wazwa, uya ndikana musololi umbi, pele akube cuti oyo ngu Jesu. Elyo Jesu ndi Bbaibbele. Sena mula syoma obo? Obu Mbuumi bwa Jesu a Milao Yakwe kuli ndiswe, mu ciimo ca lugwalo. Aboobo tweedele kulanga muli Ceeci, kubona. Eyi ni pulani. Eyi ni maapu Nja katwaambila kutobela, ku—ku Mu swaana, Buumi Butamani.

Lino tu jana kuti oyu mwaalumi mukubusyi wakali sweekede.

⁹¹ Lino atu bweze umbi. Sa inga mwayanda, sa inga mwaba a ciindi ca kubweza mweendelezi umbi muvubi mukubusyi, oyo wakabamba bweende bululeme? Sa inga mwayanda kumvwa ceeco? Yaa, tula cisola lino. Lino atu bweze mweendelezi umbi muvubi mukubusyi oyo waka langanwa a cintu nciconya. Lino tula bona oko mulombe oyo nkwa kaunka, oyo wakapona buumi bubotu loko, pele wakafwa a kusweeka mu gehena. Elyo lino mpaawa tuyu ambaula kujatikizya mwaalumi umbi mukubusyi oyo waka langanwa a cintu nciconya. Wa kali muntu muvubi, mwaalumi mukubusyi, nkabela wakali mweendelezi, alimwi, pele wa katambula busololi bwa Kristo; mbuli mulombe muniini mbwa ka twaambila kaindi kainda, kuti tweedele kutu sololela. Wa ka cizumina.

⁹² I Lugwalo lwa ceeci lujanwa, ikuti na muyanda kululangalanga Nda manizya, mwabona, bali mu Bahebrayo, cipati 11, a kampango ka 23 kusika ku 29. Andi Ci bale buyo. Sa mbo mbubo? Uyo ndikkazikila moyo aniini buyo, mulacita na? Muta bikkili maanu ikuti na Nse citi, sa mula cita? Mwabona? Aboobo tu buyo... Tula bala buyo eci, mpawo nywebo mwati, "Nda kamvwa Mukwesu Branham kabala eci kuzwa mu Bbaibbele." Mwabona? Elyo mulizi kuti nko cili mpawo. Tii kali eco Nce amba, nceeco Nca kaamba. Lino amu swiilile awa, kuli ceeco Bbaibbele ncolya kaamba awa zya mulombwana oyu mubotu, mwabona. Lino amulange.

Ku lusyomo Musa, cindi nakazyalwa, wakasiswa a bazyali bakwe kwa myeezi yotatwe, nkaambo bakamubona kuti wali mwana uli kabotu; nkabela taakwe noba kayoowa mulao wa mwaami.

Ku lusyomo Musa, cindi na...naka komena, wakaka kwiipta kuti mwana wamwana musimbi wa Farao; (amuswiilile)

Mubwini wakasala kupengela i mapenzi a bantu ba Leza, kwiinda kupengela misaalo ya zibi kwa ciindi cisyoonto;

Wakalemeka kusampaulilwa Kristo...

⁹³ Kaindi loko mu ciindi ca Musa, wa kacili Kristo. Mwabona? Ngo Nguwe alikke ujisi Buumi Butamani. Mwabona?

⁹⁴ "Kalemeka kusampaulwa," kwiipta kuti sikwiindilizya, mubumbulusi uusalala, na cintucimwi mbuli ceeco, nywebo mulizi. Mwabona?

Wakalemeka kusampaulilwa Kristo kuti mbuvubi bunji kapati kwiinda lubono lwa Egepita: nkambo wa kalemeka kujana cakupengela ca...bulumbu.

⁹⁵ Lino nywebo mulizi eco nco caamba? Ca amba eci, kuti, Musa wakazyalwa kali mulombe mucete, mucete loko. Zina lya bawisi lyakali Amramu. Zina lya banyina lyakali Jokibedi. Elyo bakali bacete ncobeni, pele bakali Banakristo. Ba kabeleka ca nguzu. Ba kali mu buzike. Ba kacita kupanga matina aamadaka, a zintu, zya mwaami mudaala. Nywebo mulizi cintu na? Oyo mwana musimbi wa mwaami wakainka kunselelo, buzuba bumwi, ku mulonga oko mutumbu...

⁹⁶ Banyina ba Musa, Jokibedi, baka mutola a kumu bikka mu kaato kaniini aanze lya mulonga mbuli boobo. Elyo ntale zyakaindi zyakaligwa boonse bavwanda baniini; nkabela bakali kubajaya, kuba sowela mu mulonga. Pele waa kamubikka mpoonya alya. Elyo mulizi obo mbwa katantamuna ntale kuzwa kuli nguwe? Waa kabamba kaato aka kaniini—kaniini nka kamubikka mukati, waa kakabamba kuzwa mu nsakizi. Nywebo mulizi mbo kabede na? Bwalo mbunzuka. Aligeta wakale

inwakali kuboola, kwaamba, "Humu, mu Hebrayo muniini uneneede, Nda mujata!" Ku mumvwa kalila mbuli boobo. Kaunka okuya, "Fyuu! Ino kununka! Uh!" Mwabona? Mwabona, banyina baka sololelwa, nzila ya kukwabilila muvwanda wabo. Aboobo wa kaleka kuzwa kuli ncico, ta kali kuyanda cintu cakucita a ceeco.

⁹⁷ Elyo mpawo wa kazumanana kuselemuka mulonga, ambele aniini. Elyo mucizi wakwe muniini, wakauzikidwe kuti Miriamu, waka mutobela kunselelo lya mulonga, kalangilila eco . . .

⁹⁸ Elyo mpawo mwana musimbi wa Farao wakazwa nkabela wakali sikumubweza, nywebo mulizi, nkabela waa kamugusya. Nywebo mulizi, boonse . . . Nywebo mulizi, banyoko bayeeya kuti uli mwana muboto maningi mu inyika; mwabona, beelede kucita ceeco. Pele Bbaibbele lya kaamba kuti mulombe oyu muniini wakali mulombe muniini mubotu loko, mulombe muniini mubotu ncobeni. Elyo, oh, wa kali kukwiila buyo a kubbansa tusindi twakwe tuniini. Wa kali kuzimba banyina, mwabona. Elyo aboobo mulizi eco cakacitika? Mpawo Leza wakabikka mu mwana musimbi wa Farao, mwana musimbi wa mwaami, luyando loonse olo mutumbu ndwakali kukonzya kuba a muvwanda muniini. Moyo wakwe waka muwida buya. Waa kati, "Oyo muvwanda wangu."

⁹⁹ Pele, nywebo mulizi, waa kali mwankazi mukubusyi. Mwabona, mazuba ayo tiiba kajisi mabbodela aya ngo mujisi, bavwanda, baka komezegwa, aboobo bakacita kuunka kuyo bweza mutumbu oyo wakali, kajisi muvwanda, alimwi kajisi, oyo wakali kukonzya kunyonsya.

¹⁰⁰ Aboobo Miriamu wakali moonya munsi, waa kati, "Ndila unka nkaku janine mutumbu weelela."

"Ee, koya uka mulete."

¹⁰¹ Nywebo mulizi na oyo Miriamu wakaunka a kubweza? Banyina beni. Mbo mbubo. Inzya, kainka a kubweza. Obo bwakali busongo, embo na? Elyo aboobo mpawo wakainka a kubweza banyina Musa beni. Elyo waa kati, "Ndiyo bweza a kukomezya mulombe muniini."

¹⁰² Waa kati, "Yebo ulizi cintu, Ndiyo kupa madollar ali myaanda yotatwe, mvwiki, kukomezya muvwanda oyo. Elyo inga wakkala mu palesi." Amubone obo Leza mbwa cita cindi wa Mu syoma, mwabona, cindi wanooli masimpe a lusyomo. Oyo muvwanda wakali musinsimi, mwabona, alimwi waa kalizi.

¹⁰³ Aboobo ba kanjila mu palesi alimwi—alimwi waa kabusya Musa, a banyina, banyina beni, a kujana madollar ali myaanda yotatwe, mvwiki, aku mamela zintuzyonse. Amu ciyeeye buyo eco!

¹⁰⁴ Elyo mpawo, nywebo mulizi, kwiinde kaindi, kumane ceeco cakazumanana kwa kaindi kaniini, Musa waka talika

kucembaala loko kubala a kulemba. Waa kamuyiisya nzila ya kubala a kulemba. Elyo mpawo waa kamwaambila, kati, "Musa, wa kazyalwa koli mwana uululeme. Bauso a Ndime twa komba. Leza wayubununa kuli ndiswe kuti uli musinsimi, elyo uyooba muvuni wa bantu, mu mazuba ayo aelede kuboola."

¹⁰⁵ Elyo nywebo mulizi, cindi naka komena, mpawo wakali nzi? Wa kapegwa bwana mu mukwasyi wa mwaami. Oh, ma! Ta keelede ku...

¹⁰⁶ Elyo wa kalanga koonse ku bantu bakwe beni, nkabela tiiba kajisi zisani. Ba kali Banakristo, nkabela bakali kulila. Elyo basikubesya bantu bakaindi bakali kubanamba kubelesya mikkwiло, abulowa bwakali kupoomoka kuzwa kusule lyabo. Beeninyina bakwe—bakwe a bamaiha, bawisi a banyina, boonse babo; kaba banabba kuubelesya mikkwiло, amuya mu zilindi ly a daka. Elyo aboobo, pele Musa, mukuba cintucimwi kunsi kwini kwa moyo wakwe, wa kalizi kuti bakali bantu baka syomezegwa aa Leza. Wa kalicizi.

¹⁰⁷ Lino, cintu citobela nca kali kuyo cita wakeelede kuba mwaami. Uyo oba mwaami ku zintu zyoonse, muntu muvubi, ma, mali oonse aa Egepita. Elyo Egepita yakali kweendelezya nyika, ku ciindi eco. Pele, amulange, Bbaibbele ly a kati, "wa keezeezya kusampaulwa," kuba sikukanda daka mbuli kubusena kuya, Munakristo. Cindi niba kaba fubaazya, a kubaseka, kuba bbompa. Ikuti na bakaamba cili conse kaindi, baka bajaya. Mwabona? Pele Musa wakasala kuunka a nkamu eyo mibusena bwa kwiiitwa kuti mwana wa mwaami.

¹⁰⁸ Amulange eco! Mwabona, nkaambo wa kabona ciindi camamanino! Mwabona oyo mwaalumi mukubusyi muvubi? Pele wa kabona Jesu, mbuli mbo tu Mu bona mu cilengaano, kuti ciindi camamanino nce ciyo bbadelela. Lino, elyo wa kazumina busololi bwa Kristo, nkabela Musa wakeezeezya kusampaulwa kwa lubono lunji maningi.

¹⁰⁹ Nywebo mulizi, ciindicimwi nywebo no balombe baniini mu cikolo, balombe baniini bayo amba majwi mabi alimwi bayanda kuti nyoonse mu baambe. Nywebo nobasimbi baniini; basimbi baniini bayo amba zintu zibi alimwi muyanda nyoonse ku zyaamba. Yebo watu, "Peee. Ndili Munakristo."

¹¹⁰ Ba lati, "Aah, yebo sibwanakazi mupati!" Yebo ulizi, koya kuli nduwe mbuli boobo.

¹¹¹ Mwabona, koimikila, kwaamba, "Ndili kkomene kuba boobo." Mwabona? Nkaambo, mwabona, eco ncencico Musa nca kacita. Wa keezeezya kusampaulwa kwa Kristo kuba lubono lunji maningi kwiinda loonse lwa Egepita. Lino atu mutobele, kweenzegwa a Kristo, a kubona eco nca kacita.

¹¹² Lino, mwabona, oyu mwaalumi mukubusyi wakali vubide, mwaalumi mutaanzi mukubusyi, pele takali kuyanda Kristo. Ta kali kuyanda kuba mutobezi wa Jesu. Elyo aboobo tu

mujana kuba simpuwo maningi, antela kuba simisobano wamu zipekupeku, a zintuzyonse zipati, muli zyoonse i—i zintu nzya kali kukonzya kucita, a zintuzyonse nzya kali kuyanda. Pele cindi na kafwa, ta kajisi naba omwe waku musololela. Aboobo, lwiyo lwakwe, olo lwakali lubotu; mali akwe, ayo akali kabotu; pele cindi lufu nilwa kasika, nku koonse, ta kacili kukonzya kwibelesya. Ta kakonzya kuula nzila yakwe kuya ku Julu. Elyo ta kakonzya, ku lwiyo lwakwe, ta kakonzya kuya ku Julu. Mwabona?

¹¹³ Pele oyu mwaalumi mukubusyi lino, wa kajisi zintu ezi zyoonse. Wa kajisi lwiyo, awalo. Walo musongo. Wa kaunka ku cikolo a bakwe... Banyina baka muyiisia, alimwi—alimwi wa kajisi lwiyo lubotu. Elyo wa kali musongo loko, kusikila, akwalo wa kali kukonzya kuiyisa bana Egepita. Wa kayiisa bamaiyi bakwe, wa kali musongo loko. Amulange obo mbwa kali musongo. Pele, nywebo mulizi cintu, kwiinda boonse obo bucenzezu, kwiinda zyoonse nzya kajisi, kukonzya nkwa kajisi, wa kacili kwaamba kuti, “Njo cisiya coonse, ku kutobela Jesu.” Sena mulizi eco ncoba kacita kuli nguwe? Ba kamutanda. Wa kaba ii—ii muzike wa muntimba mbuli bamwi babo.

¹¹⁴ Pele buzuba bumwi cindi nakaba muntu wakakomena, wa kali kweembela mbelele kusule lya lukula. Elyo ncini cakacitika? Kufumbwa muntu undaambil eco cakacitika? Ino cakali cinzi? [Ii mwana waamba, “Kwakali Mulilo mu citeo.”—Mul.] Mbo mbubo, kwakali Mulilo mu citeo, nkabela Wa kakwelezya kuswiilila kwakwe. Wa kaya ambali. Elyo mulizi cintu na?

¹¹⁵ Wa kati, “Koyiisia bana.” Lino bana bayo nyamuka a kundi yiisia. Aboobo, elyo mulombe oyu muniini awa, uli mpoonya aa i—mpoonya aeledé. Nguni uso? [Ii mwana waamba, “Ba. Shantz.”] Ba. Shantz balo mbauso. Mulombe oyo waka yiisigwa, embo na? Onse meso manini abalama kalanga munzila yomwe, limwi kwindila limbi, nywebo mwabona.

¹¹⁶ Aboobo lino amulange, wa kacita, elyo eco—elyo eco citeo caka mweebelezya, aa mulilo, elyo wa kati, “Njo nyonena ambali a kubona mbo cibede.”

¹¹⁷ Elyo Leza wakati kuli Musa, “Samununa mabbusu ako, busena mpoimvwi alasalala. Nda kusala kuunka kunselelo a kuyo vuna bantu Bangu. Ndi mupa nguzu; inga mwauma nyika ku zipenzyo, inga wa sandula maanzi kuba bulowa, inga waleta ntabwa a njina. Taakwe cintu ciyo kunyonganya. Njo kusala.” Nkaambonzi? Nkaambo wa kasala Kristo. Mwabona? Amusale Kristo, nkabela Ula kusala. Mwabona? Lino Wa kati, “Wa ka Ndi sala, alimwi Nda kakusala kuselemukila okuya mu Egepita.”

¹¹⁸ Elyo amulange eco nca kacita. Wa kasololela bantu bali mamilioni obilo, bantu bali mamilioni obilo kuzwa, bantu bakwe, akuba leta mu nyika ya cisomezyo. Elyo, lino, wa

katobela. Tula mutobel a moonse mu nkanda; alimwi nywebo nobana mwa kamvwa Mukwesu Leo a Mukwesu Gene, elyo bauso a banyoko, kumwaambila eco coonse cakacitika mu nkanda, obo mbwa kaleta cinkwa kuzwa ku julu a kusanina bantu bafwide nzala, a zintu ezi zyoonse.

¹¹⁹ Elyo lino tu jana kuti, walo mudaala lino, uli cembeede loko, walo myaka ili mwaanda a makumi obilo yakukomena. Elyo uli mu nkanda.

¹²⁰ Elyo bantu teeba kamulanganya kabotu, akwalo. Mwabona, ziindizimwi bantu abo baliita kuti Banakristo taba kulanganyi kabotu. Pele Jesu lyoonse ukulanganya kabotu. Mwabona? Mwabona? Aboobo tu jana kuti bantu bakazanga kulwana nguwe, pele wa kakkala ambabo ncobeni, nekuba. Elyo wa kali musololi, alimwi wa kacita kukkala ambabo. Elyo Baangelo ba Mwami bakaambaula kuli nguwe. Sa inga toyanda kuba a ceeco kucitika kuli nduwe? Mpawo bamba kusala kululeme, a kusala Jesu, nkabela Uyo cicita.

¹²¹ Lino, mpawo tu jana kuti, mamanino aa lweendo, wa kacembaala ncobeni. Ta kacili kukonzya kukambauka limbi, nkabela jwi lyakwe lya cesegwa. Aboobo wa kalongezya Joshua, a kwiinka atala lya cilundu, kuti afwe.

¹²² Nywebo mulizi eco cakacitika cindi na kafwa? Okuya, ncinzi, ncinzi cakacitika? [Ii mulombe waamba, “Wa kafwa, elyo mpawo Wa kamubusya kuzwa ku bafu.”—Mul.] Mbo mbubo ncobeni. Mbo mbubo ncobeni.

Lino nywebo mwati, “Cili kuli eco?”

¹²³ Lino, aniini buyo, mulombe uli luleme, mwabona. Wa kabuka kuzwa ku bafu. Lino. (Miriamu, Ndi lizi wakalizi obo. Um-hum. Wabona?) Lino amulange. Wa kamubusya kuzwa ku bafu. Nkaambonzi? Nkaambo, kumane myaka ili myaanda ya lusele, ngooyu wakali okuya mu Palestine, kaimvwi a Musololi wakwe, Jesu, oyo wakeezeezya kusampaulilwa Zina Lyakwe kuba a lubono lunji kwiinda buvubi boonse ibwa Egepita. Wa keezeozya... Musololi Wakwe wakaliimvwi alya. Nywebo mulizi, Wa kaitwa...

¹²⁴ Mu i—mu Bbaibbele, nywebo mulizi, kwakali Mwaala oyo wakaunka antoomwe a Israyeli. Elyo cindi Musa naka libambilika kufwa, wa katanta aa Mwaala oyu. Elyo oyo Mwaala wakali Jesu. Mula yeeya cindi Jesu nakali kwaambaula, alimwi mu Musalali Johane, cipati 6?

Ee, wa kat, “Bamatata besu bakalya mana mu nkanda!”

¹²⁵ Kati, kati, “Taata Wangu waka kupa mana ayo.” Wa kat, “Inzya, ba kalya mana. Mbo mbubo. Elyo bali, boonse, balifwide, nkaambo tiiba kazumanana kweenda, mwabona.” Kati, “Balo, boonse, balifwide.” Pele kati, “Ndime Cinkwa ca Buumi eco cizwa kwa Leza kuzwaku Julu.”

¹²⁶ “Bamatata besu bakanywa kuzwa ku Mwaala. Musa wakauma Mwaala,” a kuti, “nkabela meenda akazwa.”

Wa kat, “Ndime oyo Mwaala wakali a nguwe.”

¹²⁷ Elyo amulange, cindi Musa nakafwa, wa katanta aa Mwaala oyo. Nywebo mulizi eco cakacitika? I Bbaibbele lyat kati “Baangelo” bakasika a kumu bweza.

¹²⁸ Ino ndwandaano kuzwa kuli oyo mwaalumi mukubusyi! Oyo mwaalumi mukubusyi, mwabona, cindi na kafwa, ta kajisi muntu waku mujata, aboobo wa kazumizya buyo kwiinda mu mudima, kuya mu gehena, alimwi uli kokuya lino, okuya.

¹²⁹ Mpawo cindi Musa nakazwa mu buumi, cindi na kaunka, wa kabweza Musololi. Banyina baka musololela kabotu, bawisi baka muiyiisa kabotu. Elyo mpawo cindi na kakomena, mwaalumi mukubusyi, mpawo wa kat, “Nda bona Buumi Butamani, ikuti na Njo unka kumusanza a bantu aba, batakweankobaya, batabikkilwa maanu, a kweenda ambabo, nkaambo mbantu ba Leza. Ta ndeelede kucita. Inga ndaba mwaami, pele ta Ndi yandi kuba mwaami. Nda konzya kuba a mali onse ali mu Egepita, nkaambo Ndi yooba mukamwini wa ngawo. Nse ayandi. inga Nda sala kweenda a Jesu.” Elyo mpawo cindi na keenda mu buumi, elyo mpawo cindi na katalika kuzwa mu buumi, ngooyo Musololi wakwe waka mujata ku janza.

¹³⁰ Sena tamu yandi oyo Musololi? Sena toonse tu yanda oyo Musololi ku mujata ku janza Lyakwe?

¹³¹ Myaanda ya myaka yakacilila, wa kabonwa a Musololi wakwe mupati. Wa kasololela. Wa kabamba i—wa kabamba kusala, kwa bukibusyi bwakwe, elyo aboobo nkikaako Leza wakali kumujatilide.

¹³² Nywebo mulizi cintu na? I muntu muvubi uli mu gehena, oyo muntu mukubusyi muvubi umwi waakaka. Mwabona, lino amuyeeye, wa kali jisi lwiiyo, wa kali jisi bukombi, wa kaunka ku mbungano, wa kali muntu uli kabotu, pele wa kakaka Jesu. Mwabona?

¹³³ Elyo oyu mwaalumi mukubusyi, wa kali yiide, alimwi wa kajisi bukombi, pele wa kali kuyanda Jesu. Mwabona, Musa nakali muntu muvubi loko kwiinda—kwiinda mulombwana oyu mukubusyi mbwakali nooba, nkaambo wa kajisi buyo mali amwi, antela mpulazi a zintu mbuli ezyo, alimwi ndiza tunzenyu azimwi zimbi, pele Musa wa keelede kuba mwaami weendelezya nyika. Elyo wa kasiya zyoonse ezyo.

¹³⁴ Elyo nywebo mulizi cintu, bana? Cindi kwanolli Egepita, alimwi cindi no kutakwe lubono, ku cinooli Musa, nkaambo wa kasala cintu ciluleme. Mwabona? Wa kasala cintu ciluleme ku musololela.

¹³⁵ Cindi kwatano cili mapiramidi mapati! Mula bala kujatikizya mapiramidi mu Egepita? Bumwi bwa mazuba

aya, bayooba suko, kensi lya mabbomba aatomiki. Buvubi boonse bwa inyika, bantu bayo buwaala mu luwo, a kukwiila, a kwaamba kuti cakalya mu mubili wabo, a kukwiila a koongolola. Mwabona, uyo loba.

¹³⁶ Pele abo batambula Jesu kuba sololela, taba kafwi. Ba jisi Buumi Butamani. Nekubakuti bafwa munzila ya bulenge awa, Jesu uyo babusya alubo.

¹³⁷ We elede kusala. Kusala kwako kuyo bamba nkoya kwako kutamani mbo kuyooba. Amuyeeye, Jesu wabuzya umwi aumwi wesu, "Ko Ndi tobela ikuti na uyanda Buumi." Mwabona, busololi, "Ko Ndi tobela. Uyo oba a Buumi buteeli." Elyo Ndili masimpe, akwalo kuli ndiswe to bapati, tu jana cintucimwi kuzwa kuli ceeci, acalo. Ikuti na uyanda Buumi, weelete ku Butambula. Uyanda bukombi, ko buzumina. Ikuti na uyanda... Eco nco elede kucita, eco nco tambula, nce ncico ncoya kujana. Pele kuli ndime a kuli ndinywe, a ku bana aba baniini, amuyeeye, mu jisi kutambwa. Jesu wakati, "Ko Ndi tobela, ube a Buumi Butamani." Eco nco tu yanda kucita, embo na?

¹³⁸ Lino mbangaye banu bayanda kutobela ncobeni Jesu, elyo yebo wati, "Kuzwa, kuzwa, cindi Nda komena bweelede a kucembaala kweelede kubamba kusala kwangu, a kucita eco... Ta ndikwe makani kuvula kwa mali Nge jisi, obo Mbweli mucete, obo kunji bantu mboba ndiseka, na zintuzyonze zimbi, Ndi yanda kutobela Jesu. Ndi yanda kubamba kusala kwa Musa, kutali mutu muvubi mukubusyi"? Mbangaye bayanda kucita ceeco mpoonya awa? Lino mula yanda ncobeni kucicita?

¹³⁹ Ndi yanda kuti wiime a ndime. Ndi yanda kuti ubikke janza lyako lya lumwensi ku moyo wako, nkabela utambike janza lyako lya lulyo. Ndi yanda kuti ujale meso ako lino a kukotamika mutwe wako, a kwaamba buyo majwi aya kutobela ndime:

¹⁴⁰ Oyandwa Jesu, Nda syomezya buumi bwangu kuli Nduwe. Nda imvwa nkambauko eyi oko baalumi bakubusyi bobile nkoba kabamba kusala kwabo. Ta ndiyandi kwiinka nzila ya mweendelezi muvubi mukubusyi. Pele Ndi yanda kuunka nzila ya Musa. Ndili mwana buyo, nekuba. Kondi sololela, Oyandwa Jesu, ku Buumi Butamani. Ameni.

Lino kotamika mutwe wako.

¹⁴¹ Oyandwa Jesu, buzuba bumwi, mu buzwakule Bwako ano aa nyika, ba kaleta kuli Nduwe bana baniini bali boobo mbuli Mbweli kukanana masikati aya. Elyo basikwiya bakati, "I Simalela wakatala loko. Wa kakambauka cifumo cino. Wa kakambauka, eci a ceeco, alimwi Uli katede loko. Muta Mu penzyi."

¹⁴² Pele, Jesu, Wa kati, "Amuleke bana baniini baboole kuli Ndime, nkambo bali boobo mba Bwami bwaku Julu."

¹⁴³ Mwami Leza, sunu tambula balombe a basimbi aba baniini awa, mu cikolo eci ca bululami, okuno mukwesu kwa kaboola alikke ku lubazu lwa nkanda okuno, ku kugusya mikwasyi eyo kuyandisya kulyandaanya kuzwa ku zintu zya inyika, kwendeenda buyo kuli Nduwe. Elyo lino bana babo baniini bali waano, kabalangilila maumi aa bawisi a banyina, mbuli ndiswe—ndiswe tuli mikozyanayo muli zyoonse nzo tucita. O Oyandwa Leza, Mulengi wa Majulu a nyika, kosololela matende esu, Mwami, kuti tatu kaciti cintu kumbele lya baaba baniini, abo banga babikka cilebyo mu nzila yabo. Nkambo kwa kaambwa kuti, inga cabota kuti tu jisi bbwe lya ziyo lyaangidwe ku nsingo yesu, a kusowelwa mu lwizi, kwiinda kulebya umwi wa baniini aba. Wa kati, “Baangelo babo lyoonse ba langilila busyu bwa Taata Wangu oyo uuli ku Julu,” i Angelo mupati, a Angelo sikukwabilila, atala lya umwi aumwi wa buntu obu buniini.

¹⁴⁴ Mbuli mbo bakakkala masikati aya a meso abo maniini kaajukide, kabalanga a kwiingula mibuzyo, a kuswiilila twaano tusyoonto twa bana mu Bbaibbele, obo bantu aba bobilo baniini mbo bakabweza tununkilizyo twabo, alimwi umwi aumwi wabo kapa maumi abo kuli Nduwe. O Jehova Leza, koba solelela, kuba kwabilila. Elyo akube kuti bajane oyu Musololi mupati, Jesu Kristo, uya kubasololela cindi baama a bataata a bamayi baakumanizya ambabo. Akube kuti Ubasololele ku Buumi Butamani, mbuli Mbo kacita kuli Musa, mbuli mupailo, wabo, muniini mubombe mbwa kaunka kuli Nduwe. Nda bapa kuli Nduwe, Mwami, mbuli mulanda Wako, mbuli zilumbo a ngale zya musyini Wako. Ba belesye, Mwami, ku kulemeka Nduwe, aa nyika. Mu Zina lya Jesu Kristo. Ameni.

¹⁴⁵ Elyo nywebo nobana baniini, balombwana, inga... Lino mulimvwa kabotu kujatikizya ncico lino na? Yebo ulizi kuti Jesu uyo kusololela a ku kweenzya. Sena tosyomi eco? Elyo Jesu uyo mubamba kuba balombe baniini mbuli buyo Musa a Miriamu, musinsimi mwanakazi a—a musinsimi, Uyo bamba bantu balemu kuzwa kuli ndinywe.

¹⁴⁶ Lino, swebo tobantu bakaindi loko, abo baka Mu tambula, tatu Mu yandi kuti utu soleole kuyabuya, aswebo? Ndi yanda Nguwe kundi solelela, kweenzya matende angu, jata janza lyangu. Mwabona? Elyo akwalo cindi Nda selemukila ku mulonga, Ndi—Ndi yanda kujata janza Lyakwe. Toonse tu yanda boobo, embo na?

¹⁴⁷ Oyandwa Jesu, ko tusololela, aswebo, Taata. Lino tuli bambila kwandaana kuzwa kuli umwi aumwi. Nde elede kujokela ku Tucson. Nde elede kulibambilila ku miswaangano iboola. Leza, Nda tuula nkamu eyi ya bantu, Mukwesu Leo a Mukwesu Gene, a boonse batobezi awa, mu maanza Aako, kuti Uyo balongezya a kuba yanda, kujatila milandu yabo yoonse, kuponya malwazi abo oonse, kubabamba mu luyandisyo a luswaanano, a kuyumya abo bakali nooba...ku katala.

Elyo ciindicimwi Saatani inga waboola ambali a kubacitya kutyompwa, pele, amuyeeye, Mwa kainda mu cintu nciconya, kupyompwa, kasiya kwiinda—kwiinda ku bantu ba nyika eyi, a bantu. Alimwi ziindizimwi beenzuma bayandwa kapati, nomuba mu cibbululu, tula tantamukwa. Pele kuli Umwi oyo ngo twa kasala, Ta katusiyi na kutu lekelezya.

¹⁴⁸ Kotu solelola, Mwami, ku Buumi Butamani. Nda komba kuti Uyo pa kuti inga twa boola antoomwe ziindi zinji zimbi, aa nyika, a kukanana Nduwe a kwaambaula zya Nduwe. Elyo mpawo mu Buzuba obo bupati, cindi inyika yaakumana a ciindi coonse cayabaala mu Butamani, akube kuti tu kawsaangane mu Bwami obo bupati, mbuli mikwasyi itapambukene, kupona antoomwe kumbele kwalyonse. Ko cipa, Mwami. Kusikila eelyo, akube kuti tubeleke, kupakasya a nguzu zyesu zyoonse, kuciindi zuba no licimweka. Nkambo twa cilomba mu Zina lya Jesu. Ameni.

¹⁴⁹ Leza alongezye umwi aumwi wanu. [Kabeela katakwecintu aa teepu—Mul.]

Ku kweenzya Kwakwe kwalulayo, kula
mujatilila,
A maboko Aakwe ulamu vungaila kuba
kabotu;
Leza abe a ndinywe mane tuka swaangane
ciindi cimbi!

Mane tuka swaangane! mane tuka swaangane!
Mane tuka swaangane ku matende aa Jesu;
Mane tuka swaangane! mane tuka swaangane!
(Nda lumba, mukwesu.)
Leza abe a ndinywe mane tuka swaangane
ciindi cimbi!

Leza amu longezye nyoonse.



BUSOLOLI TNG65-1031A
(Leadership)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Munsono masikati, Kavumbikaniini 31, 1965, ku Pine Lawn Trailer Park mu Prescott, Arizona, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org